


■ COLUMNNA

Violenza è in segn da flaiveltezza

DA GIUSEP NAY

Igl è paradox. Il rumantsch è pli e pli ina lingua da la dumengia, e tuttina na sai jau betg scriver mia columnna per la dumengia. Jau recumondel dentant a lecturas e lecturs da salvar si ella e leger ella pér dumengia cun temp e peda e cun ina vista da sa pusar enavos e guardar las chaussas cun la distanza necessaria per arrivar ad in giudicat saun. Nagut tant main ston ins l'emprim contemplar e reflectar ils fatgs sco els èn.

Las uniuns Pro idioms sa furmadas ils davos onns or d'ina tenuta plain temas e reproschas sin tuttas varts na vegnan betg stanclas da cumbatter nies rumantsch grischun tar tuttas chaschuns. Schizunt cura ch'ina politichera postulescha a Berna da vesair co i va adina dapli da mal en mal cun il rumantsch e pretenda perquai in pli grond sustegn da quella minoritad adina pli falombra, vesan ils represchents da quellas furmazions recentas bainspert ch'in auter intent savess esser quel dal posulat: il nauschaspiert rumantsch grischun savess



vulair vegnir promovì. Ch'in auter politicher rumantsch crei quellas superstiziuns e ch'ils dirigents da la Lia Rumantscha assistan a l'acziun – sche cun u senza malart mida pauc – fa la chaussa atgnamain alarmanta. Uschia avain nus avon nus il fatg – bain dal tuttafatg unic – ch'in postulat en favur d'ina minoritad vegn cumbattì da members da la medema minoritad. Nua èn ils interess da tut tgi che vesa la gronda impurtanza da la meglra presenza dal rumantsch en la publicitad grazia mo a nossa lingua da standard –

necessari per tuttas linguas minoritaras per survivor – e da tut quels che s'engaschan di per di per promover quai e per che nossa lingua da la mamma na saja betg mo ina da la dumengia? D'ina vart vegn er laschada ina entira vallada che dovra il rumantsch grischun en scola.

Ala violenza cun la quala ils idiomists ageschan encunter tut tgi che savess esser per il rumantsch grischun e tge che savess esser en favur da nossa lingua da standard na dastg'ins betg sutta-cumber. En il cas actual survesan quels protagonist tschocs per auters fatgs cunzunt ch'il rumantsch è sin fundament da nossas leschas federala e chantunala da linguas la lingua uffiziala en la quala nossas autoritads han da communitgar cun Rumantschas e Rumantschs. Igl è perquai illegal da pretender che nagut astgia vegnir interpreti per che quellas comunicaziuns fatgas uschia sin fundament da nossas leschas democraticas vegnian er chapidas dals adressats; quai è l'obligaziun d'ina politica consequenta e cun success. I vegnoviters che las Pro idioms rumpan

qua tras er la cunvegnientscha sutscritta er da lur represchents, da procurar cun l'instrucziun necessaria en scola per questa chapientscha passiva dal rumantsch grischun almain. Quai fa la chaussa anc mendra.

Mo tgi che vesa sasez pli impurtant che la communitad solidarica ha la tema da betg subsister, essend ch'el crai e tema ch'er ils auters sa vesan uschia. Quella tema po explitgar il tun violent, mo mai giustfitgar quel. Il cuntrari, semussa qua tras mo la flaiveltezza dals arguments, sche tals vegnan insumma furnids e betg mo la vista d'in cosumerissem narcistic vala; jau repetel mamez, per tgi che ha legì mia davosa columnna. Il spiert d'in Gandhi u Mandela u Martin Luther King da renunziar – ual er or d'ina vista da minoritad – sin tutta violenza, betg mo fisica, mabain cunzunt er spiertala manca ozendi quasi totalmain almain en la publicitad mediala. Cun in tal spiert – che mussa la vaira fermezza – prendessan pli paucs memia impurtants sasez e lura dess igl ina societad e politica pli sanadeivla.